
ФАРҒОНА ВИЛОЯТИ ВА ПХЁНТХЭК ШАҲРИ ЎРТАСИДА ҲУДУДЛАРАРО ЎЗARO МАНФААТЛИ ҲАМКОРЛИКНИНГ ИСТИҚБОЛЛИ ЙЎНАЛИШЛАРИ БЕЛГИЛАБ ОЛИНДИ

Кореянинг Пхёнтхэк шаҳри мэри Чан Чжон Сон бошчилигидаги расмийлар ва тадбиркорлардан иборат делегациянинг Фарғона вилоятига бугун бошланган амалий ташрифи доирасидаги расмий тадбирлар Водилдаги вилоят ҳокимлиги “Қабуллар уйи” да бўлиб ўтди.

Икки ҳудуд раҳбарлари ва расмийлари иштирокида кенгайтирилган таркибда ўтказилган учрашувда Фарғона вилояти ва Пхёнтхэк шаҳри ўртасида ҳудудлараро амалий ҳамкорликни ривожлантиришга қаратилган савдо-иқтисодий, инвестициявий, ижтимоий, маданий, туризм ва кўплаб соҳаларда кенг қўламли алоқаларни кенгайтириш масалалари муҳокама қилинди.

Бугунги кунда дунёдаги электротехника ва меҳатроника маҳсулотлари, хусусан ярим ўтказгичлар ишлаб чиқариш марказларидан бири бўлган, йирик саноат шаҳри Пхёнтхэkning хорижий инвестицияларни жалб қилишдаги тажрибасини ўрганиш ва тадбиқ этиш, кореялик инвесторлар билан ҳамкорликда вилоятимиз ҳудудида юқори қийматли саноат маҳсулотларини ишлаб чиқариш инфратузилмасини яратиш, “Қўқон” эркин иқтисодий зонаси ва Пхёнтхэкдаги “Кёнг” ЭИЗ ўртасида ҳамкорлик ўрнатиш, Фарғона қишлоқ хўжалиги ва саноат маҳсулотларини экспортини кенгайтириш каби масалаларда аниқ чора-тадбирлар белгилаб олинди.

Мулоқот чоғида қайд этилганидек, Корея ҳозирги кунда Фарғона вилоятига инвестициялар йўналтириш ҳажми бўйича 4-ўринда бўлиб, 2022 йил давомида вилоятимиз иқтисодиётига жалб этилган 957,4 миллион доллар ҳажмидаги хорижий сармоянинг қарийб 79 миллион доллари Корея ҳиссасига тўғри келади. Жорий йилда Корея инвестицияси ҳисобига амалга оширилаётган лойиҳаларнинг умумий қиймати ҳозирги кунда 90 миллион долларни ошди. Вилоятимизда фаолият олиб бораётган Корея сармояси иштирокидаги корхоналар сони 46 тани ташкил этмоқда.

Учрашувда туризм ва маданият соҳаларида ҳамкорлик ўрнатиш, ўзаро маданий тадбирларни йўлга қўйиш, касбий таълим йўналишида қўшма лойиҳаларни амалга ошириш орқали Пхёнтхэкдаги йирик саноат корхоналарида фарғоналик малакали мутахассисларнинг меҳнат фаолияти олиб боришларини ташкил этиш каби масалаларда ҳам келишувларга эришилди.

Ҳудудлараро ҳамкорликни янада ривожлантириш мақсадида Фарғона ва Пхёнтхэк ўртасида биродарлашган ҳудудлар келишувини имзолаш борасида иш ташкил этиш белгилаб олинди.

Учрашув якунида Фарғона вилояти Савдо-Саноат Палатаси ҳамда Пхёнтхэк шаҳри Саноат ва Тижорат палатаси ўртасида Иқтисодий ҳамкорлик бўйича Англашув меморандуми имзоланди.

Учрашувда Корея-Ўзбекистон Бизнес ассоциацияси раҳбари Эдвард Ким ҳам иштирок этди.

2023-04-28 01:19:26